

Mlee mtoto katika njia impasayo, Naye hataiacha, hata atakapokuwa mzee—
Mithali 22:6.

Kushughulika na akili za vijana ni kazi muhimu mno kuwahi kufanywa na wanaume na wanawake. Uangalifu mkubwa unapaswa kuchukuliwa katika kuelimisha vijana ili kuweza kutofautisha namna ya mafundisho yanayoweza kuvutia nguvu za juu na za kuadilisha akili. Wazazi na walimu wa shule kwa hakika hawastahili kuelimisha watoto ifaavyo ikiwa hawajajifunza kwanza somo la kujidhibiti, subira, ustahimilivu, upole, na upendo. Ni nafasi ya muhimu jinsi gani kwa wazazi, walezi na walimu! Kuna wachache sana ambao wanatambua matakwa muhimu sana ya akili na namna ya kuelekeza akili inayokua, mawazo na hisia za vijana zinazokua....

Elimu ya awali ya vijana huunda tabia zao katika maisha yao ya kidunia na ya kidini. Sulemani anasema: “Mlee mtoto katika njia impasayo, Naye hataiacha, hata atakapokuwa mzee.” Hii ni lugha chanya. Malezi ambayo Sulemani anaagiza ni kuelekeza, kufundisha na kuendeleza. Ili wazazi na walimu waweze kufanya kazi hii, wanalazimika kwanza wao wenyewe kuielewa “njia” ambayo watoto wanapaswa kuipita. Hii inajumuisha zaidi ya kuwa na elimu tu ya shuleni. Inahusisha kila ambacho ni chema, adilifu, haki na kitakatifu. Inajumuisha etendaji wa kiasi, uchaji Mungu, kuhurumiana na kumpenda Mungu na kupendana sisi kwa sisi. Ili kufikia lengo hili, elimu ya watoto kimwili, kiakili, kimaadili na kiroho lazima izingatiwe.... Watoto wanapaswa kufundishwa kuheshimu uongozi wa uzoefu wa busara walio nao wazazi na walimu wao. Wanapaswa kufundishwa hivyo kiasi kwamba akili zao zitaunganishwa na akili za wazazi na walimu wao na kufundishwa kwa namna ambayo wataweza kuona uzuri wa kufuata mashauri yao. Kisha wanapoondoka kutoka kwenye mikono ya uongozi wa wazazi na walimu wao, tabia zao hazitakuwa kama matete yakiyumbishwa na upepo....

Watoto wadogo wanapaswa kuachwa huru kama wanakondoo kurukaruka huku na huko nje ya nyumba, wawe huru na wenye furaha na wanapaswa kupatiwa fursa bora zaidi za kuweka msingi kwa ajili ya malezi bora...

Mama hapaswi kupenda vitu bandia katika nyumba yake ... na anapaswa kutafuta muda wa kustawisha ndani yake na watoto wake, kupenda machipukizi mazuri na kuchanua kwa maua.... Anaweza kuongoza akili zao juu kwa Muumba wao na kuamsha katika mioyo yao michanga upendo kwa Baba yao wa mbinguni, ambaye ameonesha upendo mkuu sana kwao. Wazazi wanaweza kumhusisha Mungu na kazi Zake zote za uumbaji.... Masomo haya, yakitiwa chapa katika mioyo ya akili za watoto wadogo katikati ya mandhari ya kupendeza na ya kuvutia ya asili, yatadumu mioyoni mwao (**Testimonies for the Church 3:131-137**).